



partii naleraq

UKA 2016/014-01

09-11-2016

**2016-imi Nunanut allanut tunngasutigut naalakkersuinikkut ingerlatsineq pillugu nassuiaat.**

(Inuussutissarsiornermut, Suliffeqarnermut Niuernermit Nunanullu Allanut Naalakkersuisoq)

Nunanut allanut tunngasutigut naalakkersuinikkut ingerlatsineq pillugu nassuiaat 2016.

Partii Naleraq sinnerlugu imannak oqaaseqarfigissuarput.

Uagut issittormiuusugut, nunallu issittumiittut, pingaartumik kalaallit nunatta, ukiuni kingullerni, pingaartumik aamma pinngortitap allanngoriartornerata kingunerisaanik, minnerunngitsumillu nunatsinni pissuussutit uumaatsut pissutaallutik assorujussuaq nunarput nunanit allaniit ilisimatuussutsikkut soqutigineqarput.

Tassami paasissutissarpasuit assigiinngitsut aamma nunarsuarmioqatitsiniit assut soqutigineqartut nunatsinniipput. Taamaammat ilisimatuut nunani allaneersut allallu inuit nunatta avataaniit tikittartut, ilaatigut nakkutigineqarpiaratik nunatta sineriaani angalasartut annerusumik piunaffigalugit nakkutigineqarnerunissaat piunasaraarput. Pingaartumik aamma umiarsuit tingerlaataannallit nakkutiginerunissaat eqqarsaatigalugu.

Paasissutissammi assigiinngitsut nunatsinniit annissorneqaannaratik tamakkiinerusumik nunatsinni katersorneqarnissaat qulakkiissallugu pisariaqartorujussuummat.

Tupinnanngitsumik aamma danmarkimi issittup pingaartumik aamma kalaallit nunatta atorluarneqarnissaata avaqqukkuminaassusia takoreersimavaa, ukiorpassuarnilu pingaartumik illersornissaq sillimaniarnissarlu eqqarsaatigalugu danmarkip nunatsinnik pinngitsuuisinnaanginnera atorluartariaqaripput Partii Naleqqamiit piunasaraarput.

Tassami danmarkip Nato-mut ilaasortaanermini nunarput naalagaaffeqatitut aningaasatigut allarpassuartigullu qanoq atsigisumik sipaarutigisarneraa pillugu misissuiffigilluassallugu nalilersuiffigilluassallugulu piumasaqaatigissallugu pingaaruteqarpoq.

Tassami akuerinngilarput, danmarkimiit ukiumut tapiissutaannarnik taallugit tuppallersaaserneqartarnerput. Nutaamik nalilersuinikkut nunatta nunanit allaniit atornerqarnera pillugu isumaqatigiissusiortoqartariaqarpoq, soorlu aamma inatsisartunut ilaasortap Hans Enoksen-ip, Partii Naleqqamiit, Sara Olsvig-ip Inuit Aqatigiinneersup, ukiakkulli 2015-imi illesornissamut isumaqatigiissutip 1951-imeersup nalilersorneqaqqinnissaa isumaqatiginniutigeqqinnissaalu pillugit aaliangiiffigissatut siunnersuuteqareersut ukiaq manna inaarutaasumik suliarineqartussanik.

Pituffik nunatsinnut aningaasaqarnikkut sunniuteqarnerusumik malunnaateqarnerusumillu isumaqatigiissuteqarfigineqartariaqarpoq.

Nunatsinni Namminersorneq eqqunneqareerpoq aamma nunatta nammineq naalagaaffinngornissaa maanna anguniarlugu sulivugut.

Taamaammat nunatta nunasiaataanerata nalaanili pissutitoqqat ingerlaannarnerat akuersaanngilarput.

Taamaattumik Pituffimmik atuneq pillugu nutaamik isumaqatigiissusiortoqarnissaa tamatta piumasarisariaqarparput.

Nunarsuarmioqatitta tupinnanngitsumik aamma sullualukkut ikerasaqqulluni siunissami nioqutissanik allanillu umiarsuit atorlugit angallannissat pilersaarusiulereerpaat.

Uagut angallannissamut tassunga qaninnerpaajusugut, qularnanngitsumik assigiinngitsutigut sunnerneqapiluttussaanerput sillimaffiginerusariaqarparput, tassami immamik inuussutissarsiuteqarnerput maannamut suli pingaarnerpaajuvoq.

Piareersaasiornissaq nunanillu allanik angallannissaq qulaani pineqartoq pillugu isumaqatigiissusiornissat sulissutigineqarnissaat matumuuna kaammattuutingaarput.

Aammaarluta manna iluatsillugu rubin-it nunatsinniik ukiorpassuarni annissorneqartut nunatsinnut iluaqutissanngorlugit utertsinneqarnissaat pimoorullugu sulissutigisariaqartoq kaammattuutigeqqipparput, inatsisitigullu allannguinnissanik kinguneqassangaluarpulluunniit.

Aasap ingerlanerani § 37-ikut Naalackersuisunut apeqquteqarpunga Tului nunaata EU-miit aniniarneranut tunngasut pillugit, tassa Kalaallit Nunatta EU-llu akornani akitsuutitaqanngitsumik aalisakkanik niuerneq pillugu.

Naalackersuisut taamani akipput, Tului nunaat minnerpaamik ukiut marluk aatsaat qaangiuppata EU-miit anisussaamat nutaamik isumaqatigiissusiornissamut periarfissaqartoq. Aap periarfissaqarpoq, kisianni Partii Naleqqamiit kaammattutigissuarput, tului nunaannik isumaqatiginninniarnert piaartumik aallartinneqartariaqartut, tassami ilinniartitaanermut tunngasut aamma tassani, minnerunngitsumillu aalisakkanik niueruteqarnitsinnut tunngatillugu qulakkiingassat pingaaruteqartorujussuummata.

Taamaamat aamma USA-ip niuernikkut Tului nunaannituulli isumaqatigiissusiorfigineqarnissaa anguniartariaqarpoq, pingaartumik aamma aalisanik tunisassiatta avammut niuerutigineqarnerisa allaat akitsuuteqanngitsumik USA-mut annerusumik tunisassiarisinnaanerit ilanngullugu.

Aamma taamaappoq imermik avammut tunisassiornerusinnaaneq, pingaartumillu erngup nukingata avammut nioqutigisinnaanera aamma ilanngullugu.

Tamanna danskit naalackersuisuisa paasisariaqalerpaat, uagut nuna manna sutigut tamatigut aamma aningaasarsiornikkut iluaqutiginiarlugu tamaviaaratta.

Taama naatsumik oqaaseqarluta nassuiaat pingaarnersiulluta oqaaseqarfingaarput.